

Script of Morning Gojri News Bulletin 14 December 2024 at 1015Hrs

مارننگ گو جری نیوز بلیٹن مو رخہ 14 دسمبر 2024

یوہ آکا شوانی جموں ہے محمد اکرم چودھری تیں خبر سُنو۔

PM National Conference

وزیر اعظم نریندر مو دی اج نوی دہلی مانہ چیف سیکریٹریاں غی چوتھی کا نفرنس غی صدارت کریں گا۔ اس کا نفرنس غو مقصد مرکزی تے ریا ستی سرکاراں غے درمیان سانجہ داری نانہ مزید مضبوط کرنوہے۔ جس مانہ تعاون ور مبنی وفاقیٹ نانہ باہدو دین تے تیز رفتار ترقی غا حصول واسطے بہتر تال میل نانہ یقینی بنانوہے۔ اس طرح غی پہلی کا نفرنس جون 2022 مانہ دھرم شالہ مانہ منعقد کی گئی تھی۔ اس غے بعد جنوری 2023 مانہ کا نفرنس غو دوجو تے تیجو شمارو گذشتہ سال دسمبر غا مہینہ مانہ نوی دہلی مانہ ہوؤ تھو۔ مہارا نمائندہ نے خبر دتی ہے کہ تمام ریا ستاں تے مرکزی زیر انتظام علاقاں غا سینئر افسراں، چیف سیکریٹریاں، حلقہ ماہرین سمیت دوجا وی اس کا نفرنس مانہ حصو لیں گا۔

LS Consitution

لوک سبھا اج بھارت غا آئین 75 سال غا شاندار سفر ور خصوصی بات چیت دوبا رہ شروع کرے گو۔ وزیر اعظم نریندر مو دی لوک سبھا مانہ بحث ور جواب دیں گا۔ پچھلے تہاڑے لوک سبھا نے ملک مانہ آئین نانہ اپنایا جان غا 75 بہرا مکمل ہون ور دو روزہ بحث غو آغاز کیو تھو۔ آغازی بحث مانہ وزیر دفاع راجناتھ سنگھ نے کہیو جے بھارت غا آئین نے ملک نانہ بہتر بنان واسطے سماجی، اقتصادی، سیاسی تے ثقافتی زندگی نانہ اک ہموار رستو فراہم کرایوہے۔

USRRB

ادھم پور با رہمولہ ریل لنک پروجیکٹ ور رستاں غو کم پچھلے تہاڑے مکمل ہو گئیوہے۔ جس غو اعلان مرکزی وزیر اشونی ویشنو نے کیوہے۔ اپنا اک سماجی میڈیا پوسٹ ور جناب ویشنو نے اس نانہ اک تاریخی سنگ میل قرار دتوہے۔ انہاں نے کہیو جے اس پروجیکٹ ور حتمی کم مکمل ہو گئیوہے۔ انہاں نے کہیوہے جے 3 عشاریہ 2 کلو میٹر لمبی سُرنگ ٹی 33 جہیڑی کٹڑہ تے ریا سی نانہ جوڑے اُس غو کم کل پیشی 2 بجے مکمل ہو گئیوہے۔ انہاں نے اس نانہ بھارتی ریلوے غو اہم سنگ میل قرار دیتاں واں کہیوہے جے ہُن امید ہے جے جنوری 2025 توڑی پہلی برائے راست ریل گڈی قومی راجدھانی دہلی نانہ سرینگر نال آپس مانہ برائے راست جوڑے گی۔

LG Sinha

لیفٹنٹ گو رنر منوج سنہا نے گذشتہ روز تامل ناڈو توں نوجواناں غا اک وفد نال گل بات کی ہے جہیڑا جموں کشمیر مانہ ”یوا سنگم“ مانہ ”ایک بھارت سریشٹھ بھارت“ پہل غے تحت 5 روزہ دورہ ور جموں کشمیر آیا واہ ہیں۔ گل بات غے دوران کہیو جے تامل ناڈو تے جموں کشمیر پچھلا کا فی وقت تیں اک دوجا نال ہمیشہ جڑیا واہ ہیں۔ انہاں نے مزید کہیو جے مہارا نوجواناں غو سماجی شعور تیز ہے۔ تے اُن غا بڑا خواب نہ صرف اپنا واسطے ہیں بلکہ عظیم ملک غی ترقی واسطے وی ہیں۔ انہاں نے کہیو جے نوجواناں نے اپنی پسند غا مستقبل واسطے سوچنو شروع کر لئیوہے تے بہتر سماج غی خاطر آگے بدھن ور کم کر رہیا

ہیں، جہیڑو انصاف تے سماجی برابری ور مبنی وے۔ اس دوران لیفٹنٹ گورنر نے گل کرتاں واں پچھلا 10 سالان مانہ چلایا گیا نوجوان مخصوص پروگراماں تے پالیسیاں غا با رہ مانہ وی دسیو۔

CM Academic

وزیر اعلیٰ عمر عبداللہ نے نوجوان نسل غی درپیش بے پناہ دباؤ ور لو کھلی، خاص طور ر ور تعلیمی فضیلت حاصل کرن واسطے غیر حقیقی توقعات، جہیڑی اُن غو بچپن خس لیں تے ان واسطے خوشی غی گنجائش کھٹ کریں۔ کنونشن مرکز جموں مانہ اک تقریب غے دوران بولتاں واں اُنہاں نے متوازن نقطہ نظر ور وی زور دتو۔ اُنہاں نے اس دوران طلباء نانہ سیکھن نانہ اپنان، جسمانی سرگرمیاں مانہ مشغول رہن تے نصابی کتاباں توں اگے بدھ غے پڑھن نانہ ترجیح دین ور زور دتو۔ اُنہاں نے زور پایو جے تعلیم صرف تعلیمی اداراں تک محدود نہیں بے بلکہ یاہ زندگی غا تجربات نال وی حاصل کی جا ئے۔ اُنہاں نے نوجواناں ور زور پایو جے وے دوجاں غی غلطیاں تیں سیکھیں تے اگے بدھیں۔

BsF Jammu

سرحدی حفاظتی دستہ بی ایس ایف نے بھارتی علاقہ مانہ دراندازی غی کو ششاں نانہ ناکام بنان واسطے اپنا دراندازی مخالف گروڈ نانہ مضبوط کیو بے۔ اس تیں علا وہ بی ایس ایف نے اپنا وسائل نانہ متحرک کیو بے۔ تاکہ انسداد ڈرون نظام نانہ مضبوط کیو جاسکے۔ اور تمام بین القوامی سرحداں ور منشیا ت تے اسلح غی سرگرمیاں نانہ روکیو جاسکے۔ بی ایس ایف انسپکٹر جنرل ڈی کے بورا نے اک پریس کانفرنس مانہ دسیو بے جے مہارو مقصد جموں مانہ صفر دراندازی نانہ یقینی بنانو بے۔
